

## KOMISAUN REFORMA FISKAL

16 Setembru, 2016

PR#6

### **Ekonomistas Governu sei analiza impaktu husi projetus investimentu públiku**

*Dili-* Grupu ekonomistas ho analistas 21 husi Ministerius Finansas, Planeamentu ho Investimentu Estratejiku, no Asuntus Ekonómikus kompleta ona formasaun loron ha'at relasiona ho analize projetus investimentu publiku. Formasaun ne'e atividade dauluk husi programa formasaun ba tinan rua, ne'be halo parte esforsu reforma fiskal atu hadia prestasaun servisu.

Iha formasaun, ne'ebe organiza husi Banku Dezenvolvimentu Aziatiku (ADB) hamutuk ho Komisaun Reforma Fiskal no Diresaun Nasional Polítika Ekonómiku, funsionarius governu aprende halo nu'usá analiza impaktus ekonómiku ho finanseiru husi projetus investimentu. Sira aprende mos halo nu'usá aplika habilidades foun hirak ne'e hodi estuda projectus Timor-Leste nian.

Analize kuidadozu ba projetus investimentu sei tulun uza didiak rekursus públiku. "Governu Timor-Leste komprometidu atu uza polítikas ne'ebe bazeia ba evidensias," dehan Vise-Ministru Helder Lopes. "Nune'e, kritiku tebes katak funsionarius governu hetan habilidades nesesáriu atu avalia se projetus investimento nia kustu sei efetivu duni, no se sira konsege duni oferese benefisius ba povu Timor-Leste."

"Governu presiza ekonomistas ne'ebe bele tulun ema hakerek politikas ho avaliasaun tekniku detalladu ba kustu ho impaktu husi politika fiskal," dehan Kordenadora Komisaun Reforma Fiskal Fernanda Borges. "Kapasidade hirak ne'e presiza tur iha ministériu sira ho responsabilidade ba investimentu, gastus ho koleta reseita atu ita bele komprende benefisius ho impaktus husi projetus, liu-liu ba ema kiak sira."

"Harii kapasidade iha analize ekonomiku sei tulun Timor-Leste alkansa rezultadus diak liu husi nia investimentus públiku," dehan Representante ADB Paolo Spantigati. "ADB kontente tulun formasaun ne'e, no hau impresionadu haree estudante sira servisu makas."

Partisipante sira simu formasaun relasiona ho halo nusa identifika projetus, halo nu'usá reve projetus nia estudus viabilidade, no halo nu'usá analiza kustus ho benefisius ekonomikus. Formasaun iha ekonomia ba funsionarius governu sei kontinua iha parseria husi Ministériu Finansas ho ADB nia okos.

#### ***Komisaun Reforma Fiskal***

*Komisaun Reforma Fiskal hanesan organismu tekniku estabeselese husi Sextu Governu Konstitusional Timor-Leste, Rezolusaun no. 26/2015, ho mandatu atu avalia formas reseita atual ho foun hotu. Hadia prestasaun servisu iha governu hanesan área prioridade ida ba Komisaun Reforma Fiskal ne'ebe sei servisu ho ajensia relevante hotu iha governu atu orienta ho implementa reformas.*

Atu hetan tan informasaun, favor kontakta: Celestina da Costa Barros, Komisaun Reforma Fiskal, iha numeru 7537 9228, [cbarros@mof.gov.tl](mailto:cbarros@mof.gov.tl)